

UPNk euskararekiko duen jarrera salatu dute HBko zinegotziek

Iruñeko Udalak antolatu dituen ekintzek «porrot egin» dutela diote

UPNk euskararen inguruan duen jarrera salatu zuen atzo prentsurrekoan Iruñeko HBko udal taldeak. Azken urteetan Iruñeko Udalak euskararen inguruan antolatu dituen ekintzek «porrot egin» dutela azpimarratu zuten HBko zinegotziek. Halaber, euskararen erabilerari buruzko ordenantza aurkeztu zutela jakinarazi zuten HBko kideek, eta UPNk eztabaidatu ere ez duela egin gaineratu.

IRUÑEA

Iruñeko Udaleko HBko zinegotziek, Marine Pueyo, Alberto Petri eta Fernando Biurrunek, UPNk euskararekiko duen jarrera salatu zuten atzo prentsurrekoan eta azken hilabeteetan gertatu diren hainbat jazoera azaldu zituzten. «Urteetan zehar hutsik egon den eta dagoen itzultzaile postua, dirulaguntzen murriztea, Euskarazko Zerbitzu Teknikoa ez osatzea, elebitasunari buruzko akordioa ez betetzea eta bertan behera uztea» izan ziren, besteak beste, HBko

zinegotziek salatu zituzten ekintzak.

Zinegotzi abertzaleek azaldu zutenek, egun dirulaguntzak emateko irizpideak eta kopurua finkatzeko ahalmena zinegotzi ordezkarien esku dago «eta nahi dutena egiten dute, beti euskararen kalterako». Hau kontuan izanik, sistema horren orde, dirulaguntzak emateko irizpidea eta kopurua zehazteko ahalmena udalbatzak berak izatea proposatu zuten Herri Batasunako udal taldeak.

Halaber, UPNren eta PSOEren botoen bidez elebitasunari buruzko akordioa bertan behera gelditu ondoren, euskararen erabilera eta normalkuntza arautzeko ordenantza proiektua aurkeztu zuten HBk, zinegotziek azaldu zutenek, «baina eztabaidatu ere ez dute egin nahi izan». Gauza bera gertatu zen hizkuntz eskakizunen inguruko proposamena egin zutenean, «ezta kasurik ere».

PSOE IU ETA EA

UPNk euskararekiko duen jarrera salatzeaz gain, PSOE, IU eta EA alderdien jokabidea ere salatu edo zalantzan jarri zuten Herri Batasunako zinegotziek. PSOEri dagokionez, UPNk, askotan, euskararen aurkako neurriak

hartzeko duen «laguntzailea» dela azpimarratu zuten HBkoek. Besteak beste, elebitasunari buruzko akordioa bertan behera uztearen aldeko botoa eman zutela gogoratu zuten HBko kideek.

Halaber, Izquierda Unidak euskararen inguruan agertu duen alderdikeria salatu zuten zinegotziek, «botoak lortzeko asmoz». Bestalde, Eusko Alkartasunaren jokabide kontraesankorra nabarmendu zuten Herri Batasunako kideek; euren irudiko,



Fernando Biurrun Iruñeko Udaleko zinegotzia.

alderdi honek, «bere burua euskaltzale eta abertzaleztat duen alderdia izanik, PSOEek eta UPNk euskararen inguruan

egindako promesa faltsuak sinetsi egin ditu, euskararen aldeko apustu argi eta garbia egin ordez».

Parisko Euskal Etxeak 39. urtemuga ospatuko du asteburu honetan

DONOSTIA

Parisko Euskal Etxeak bere 39. urteurrena beteko du heldu den asteburuan. Ospakizun horren kariatz, hainbat ekitaldi prestatu dituzte Euskal Etxeko kideek. Bihar hasiko dira estreinako ospakizunak, iluntzeko zortzi t'erdietan hain zuzen ere. Ordu horretan Gernika abesbatza mistoak eta Anaiki gizonetako abesbatzak kantaldi aparta eskainiko dute. Euren ondoren, Lakuntzako gaiteroak eta Philippe Saenz txistularia izango dira giroa berotzen jarraituko dutenak. Hau guztiau Passyko elizan izango da, eta sarrera ere doan izango da. Pare bat ordu geroago, gaueko hamar t'erdietan, Izen Gabeak taldearen dantzaldia ikusteko parada edukiko dute Euskal Etxera gerturatzen direnek.

Biharamunean ere izango da zer ikusia: goizeko hamaiketan elizkizuna izango dute, eta segidan hamaiketako ere egingo da. Eguerdiko ordu batean, bestalde, bazkaria. Bazkari honek ohorezko gonbidatu bat edukiko du: egunotan frantsesera itzuli berri diren bere hiru liburu Paris aldean aurkeztzen ari den Bernardo Atxaga idazlea, hain zuzen ere.


EGUNKARIAREN ALDEKO JAIA

Baina ez da asteburu honetako Parisko Euskal Etxeak egunotarako aurrikusita daukan jai bakarra, apirilaren 8an ere EUSKALDUNON EGUNKARIAREN aldeko jai ospatuko baita Frantziako hiriburuko txoko honetan.

Iñaki Uria EGUNKARIAKO kontseilari ordezkariak eskainiko duen hitzaldia izango da jai honetako lehen ekitaldia. Henri Mogaburuk aurkeztuko du ekitaldi hau, eta itzultzailea Mixel Irigoien izanen da. Arratseko zazpitan, berriz, txalapartak eta trikitiak lagundutako poteoaren txanda izango da, eta ordu t'erdigeroago, bapo afaltzeko aukera; menua: marmitakoa, gazta eta entsalada, Nafarroako ardoz lagunduta.

Eta eguna behar den moduan amaitzeko, ezin musikarik falta. Lehenbizi, Anje Duhalderen kantaldia aipatu behar; kantaldi hau gaueko hamarretan hasiko da. Eta gauerdian jada, Alaitz eta Maider trikitilariak eskainiko duten dantzaldi mundialarekin amaituko da eguna. Ekitaldi hauetan guztietan parte hartu nahi duen edozeinek, Euskal Etxean bertan eskura dezake sarrera.

Zure lehenengo musua ahaztuta badaukazu, gogora ezazu gaur gauean.



NIRE NESKA

MACAULAY CULKIN, ANNA CHLUMSKY,
JAMIE-LEE CURTIS ETA DAN AYKROYD
protagonista dituen filme xamurra

22:00
Gaur

GOENKAL Eren ostean

IKUSGARRIA

ETB

1